

Pilota ♦ Armendarizek eta Ariznabarretak 3. aldiz jokatuko dute elkarren kontra manomanistan

Sekreturik gabe

Gaurko irabazleak Beloki txapeldunaren kontra jokatuko du

Enekoitz Telleria / Donostia



PRIMERAN ezagutzen dute elkar. Ia zazpi urte daramatza profesionaletan Karlos Armendarizek, eta bederatzi ez ditu urrun Karmelo Ariznabarretak. Makina bat aldiz jokatuko izan dute elkarren kontra eta elkarrekin, binaka. Buruz buru, berriz, gaur jokatuko dute Iruñean hirugarren aldiz. 97an jokatuko zuten estreinakoz Arbizon eta Ariznabarretak irabazi zuen (22-9). Bergaran jokatuko zuten iaz eta Armendarizek irabazi zuen hura (22-17). Gaur apurtuko da berdinketa Labriten.

Garbi dauka pilotari bakoitzak nola jokatuko duen. Armendariz uneotan Asegarcen ari den pilotari jotzaileenetakoa da. Eskuin kolpean oinarritzen da bere jokoa buruz burukoan. Airez, berriz, primeran defendatzen da. Ariznabarretaren dohaietako bat da, hain zuzen, airezko defentsa ere. Kolpe erabakigarriarik ezean, sakean eta errematean, aurreko koadroetako jokoa oinarritzen da haren buruz burukoa. Galdakaoko aurrelariak, ordea, eskuin eskuko tendioan arazoak ditu duela bi hilabetetik. Guruzbidea da berea. Nahikoa lanekin amaitu zuen Zearraren kontrako

kanporaketa, eta gaurkoa jokatzeke erabakia ere ez du azken ordua arte hartu. Iku-si egin beharko da eskuin esku horrek eusten dion.

Armendariz da gaurkoa irabazteko faboritoa. Orkoiengoak, ordea, errespetu handia dio Ariznabarretari: «Karmelo ez da agian partidu honetarako gehiegi entrenatu, baina baliabide asko dituen pilotaria da. Sekearekin, batik bat, min handia egin dezake Labrit bezalako frontoi batean».

Eskuak ozta-ozta izanda, arriskatu eta bere jokoa egiten saiatuko da Ariznabarretak: «Garbi dago nik ez diodala zazpi edo zortzi koadrora joko uneotako jotzaile handienetako bati».




Armendariz eta Ariznabarreta, iaz elkarren kontra jokatutako partiduan.

Santi eta Hirigoioren Asperen estreinakoan

E. Telleria / Donostia

LOGROÑO abiatuko da gaur Asperen lehen mailako manomanista profesionala. Santi errioxarrak eta Philippe Hirigoioren baionesak jokatuko dute estreinako partida.

Philippe Hirigoioren Asperen bigarren mailako finala jokatuko eta galdu berri du Aimar Olaizolaren kontra, baina finalean sartzeak eman dio lehen mailakoan aritzeko txartela. Buruz buru zailduta dator. Partida asko jokatuko ditu azkenaldian eta Santi ustekabeen harrapatzea izango da bere helburua. Izan ere, buruz buruko lehenengo partidak arriskutsuak izaten dira, eta



zailduta datorren kontrario baten kontra are arrisku-tsuagoak. Dena dela, Hirigoioren baino gehiago da Santi

printzipioz. 1997ko txapelketan, esaterako, Jokin Errasti (Adarragan 16-22) eta Ruben Beloki egungo

txapelduna (Labriten 19-22) utzi zituen kanpora. Erregulartasuna, hala ere, ez da bere bertuterik onena.

txokoan

Haritz Sestaoko lau t'erdiko finalera

Sestaoko Las Llanas frontoian jokatuko zuten atzo Haritzek eta Atxak, bertako lau t'erdiko torneoko finalerdia. 22-17 irabazi zuen Haritz amezketarrak, eta finalean arituko da. Beste finalista, Berasaluze VII.a-Berraondo finalerditik irtengo da datorren astean.

Hegoalde-Iparalde lehia Gasteizen

Gaur jokatuko da Gasteizko Ogeta eta Olabe frontoietan, eta Maitena trinketea, Hegoaldeko eta Iparaldeko pilotarien arteko lehia. Ogetan (11:30) eskuz banaka, Gure Kirola eta Biarritz A.C. klubak ariko dira. Ondoren, eskuz binaka, Oskarbi eta Biarritz A.C. Zestapuntako partida Olaben jokatuko dute (12:30) Zidorra eta Kostakoakek. Maitenan (10:30), Ramuntxo eta Abarratiak eskuz banaka, eta Behar Zana eta Noiz-baitek xarean (11:30).

gaurko partiduenak

Iruñea. 16:30 (Tele 5)

• Gorostiza-Pinedo / Errandonea II.a-Pascual • **Euskal Herriko Manomanista:** Armendariz-Ariznabarreta • Unanue-Zearra / Tirapu-Arretxe.

Logroño. 19:30

• **Asperen manomanista profesionala:** Santi-Hirigoioren • Eugi-Elkoro / Titin III.a-Zezeaga • Dani-Arroyo II.a / Gonzalez-Apeztegia.

Oion. 19:00

• Legorburu-Odriozola / Arroyo III.a-Bazeta • Zabala-Oliden / Esnal-Mendia.

Galarreta. 16:00

• Bereziartua-Etxeberria II.a / Agirresarobe-Zestau III.a • Zeberio II.a-Aizpuru / Altuna I.a-Iriarte • Elizalde-Auzmendi / M. Lekunberri-Etxabe • Kalongemendizabal / Inigo-Imaz.

Euskal 16:00

• Ziganda-Badiola / Zalakain-Gaztelu • Ezkurra-Urretabizkaia II.a / Altuna II.a-Eizagirre • Lezea-Lizaso / Urretabizkaia I.a-Txikuri • Zeberio I.a-J. Etxeberria / Sarasua-Amenabar.

Deportivo. 17:00

• **APNABiren aldeko jaialdia:** Zesta: Uriarte-Castro / Egiguren II.a-Barrondo • Pala: Insausti-Leunda / Iriondo-Juan Pablo.